



**Uunga siunnersuut: Qamutit motorillit akileraarutaat pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2018-imeersoq (Qamutit motorilinnut taamaallaat innaallagissamik brintimilluunniit ingerlatilinnut plug-in hybridbiilinullu akitsuut kiisalu igitassangortitsinermi akiliut)**

(Aningaasaqarnermut Naalakkersuisoq)

(Siullermeenera)

**Uunga siunnersuut: Eqqussuinermi akitsuutit pillugit Inatsisartut inatsisaata allangortinneqarnera pillugu Inatsisartut inatsisaat nr. xx, xx. xxx 2018-imeersoq (Plug-in hybridbiilit akitsuutaat, biilinut innaallagissamik imaluunniit brintimik ingerlatilinnut akitsuummik akiliisussaanginneq kiisalu qamutit motorillit nunaannakoorutit minnerusut akitsuutaannik atorunnaarsitsineq)**

(Aningaasaqarnermut Naalakkersuisoq)

(Siullermeenera)

Uani siunnersuutini pisatsinni siulleg qamuterallannut ATV-nullu akitsuummik atorunnaarsitsissaaq, tamannalu inuutissarsiortunut aamma innuttaasunut ataasiakkaanut pitsaasuvoq. Ataasiakkaanut kiffaangissuseqarnerulersitsissaaq aamma innuttaasut pissakinnerusut taakkunanga qamutinik motorilinnik pisinissaminnut periarfissarissaarnerulissapput. Peqataanik qularutigineqassangilaq siunnersuutip ilaa taanna siulleg inuutissarsiortunut namminersortunut qamutinik motorilinnik atuisunut iluaqusiisussaammat. Taamaattumik siunnersuutip ilaa taanna Demokraatini tamakkiisumik tapersorsorparput.

Aappaani aamma nuanniitsortalimmik, Naalakkersuisut siunnersuutigaat plug-in-hybridbiilit batteriik innaallagissamik immeqqinneqarsinnaasunik ingerlatillit aammali innaallagissamik brintimillu ingerlatillit angisuumik akitsuusersorneqarnissaat. Tamanna akerlarpur assigiingitsut pissutigalugit.

Siullermik isumaqarpugut eqqunngitsuusoq plug-in-hybridbiilit batteriik innaallagissamik immeqqinneqarsinnaasunik ingerlatillit kiisalu innaallagissamik brintimillu ingerlatillit motorinut akitsuusersorneqarnissaat tunngavilersuutigilluarneqarsinnaammat, inoqarmat qamutinik motorilinnik pisisimasunik naatsorsuutigalugu motorimut akitsuummik akiliinginnissartik. Tassani inuit uukapaatitaasut oqartoqarsinnaavoq.

Aappaatut isumaqartuaannarpugut suliniutinik aningaasalersuinissamut akileraarutit akitsuutillu periarfissani kingullerpaatut atorneqartassasut. Tassani pivarpur akitsuutinik allanngineq. Tassa imaappoq akileraarutit akitsuutillu tamakkiisut artukkiinerat siunnersuut pissutaalluni millinaviangilaq.



Kissaatigineruarput qamuteralaat ATV-llu akitsuutaannik atorunnaarsitsineq pisortat allaffeqarfiini sipaaruteqarnikkut aningaasalersorneqassasoq, nutaanik akitsuutininik nassaartuinnarani.

Pingajussaattut isumaqarpugut oqartoqarsinnaanngitsoq plug-in-hybridbiilit batteriini innaallagissamik immeqqinneqarsinnaasunik ingerlatillit kiisalu innaallagissamik brintimillu ingerlatillit massakkut pilerigineqarlualersimasut. Uangut isumarput naapertorlugu aatsaat nioqquteqarneq aallartilaalerpoq taamaattumik nioqquteqarneq aseroriaannaavarput siunnersuutigineqartutut tassanngaannaq aalajangissagutta taama sakkortutigisumik akitsuusersuiniarluta. Paasissutissat piviusut naapertorlugit 2014-mili plug-in-hybridbiilit batteriini innaallagissamik immeqqinneqarsinnaasunik ingerlatillit 400-t tunineqarnikuupput kiisalu biilit innaallagissamik ingerlatillit 40-t. Demokraatini isumarput naapertorlugu oqartoqarsinnaanngilaq pisagut pilerigineqartupilussuusut.

Tamatumunnga atatillugu aamma eqqarsaatigisariaqarpoq plug-in-hybridbiilit batteriini innaallagissamik immeqqinneqarsinnaasunik ingerlatillit kiisalu innaallagissamik brintimillu ingerlatillit avatangiisinut mingutsitsinnginnerummata biilnut benzinatornut dieselitornutullu naleqqiullugit. Kalaallit Nunaat pilerisaarutigerusupparput minguitsutut aamma klimamik paarsilluartutut - taamaaliorsinnaanngilagulli avatangiisinut mingutsitsinnginnerusunik biilisinissaq ajornarnerulersissagutsigu akisunerulersillugulu.

Naalakkersuisut Demokraatit isummersuutaat qulaaniittut akuerisinnaanngippatigit, Naalakkersuisut kaammattussavagut siunnersuut ullormut oqaluserisassanit peeqqullugu.

Tamanna tunngavigalugu siunnersuut Aningaasaqarnermut Akileraartarnermullu Ataatsimiititaliami suliaassanngortipparput siunertaralugu aappassaaneernejarnissaanut atatillugu allannguutissanik siunnersuusiortoqarnissaa uani oqaaseqartartup saqqummiussaani immikkoortut allaaserineqartut naapertorlugit.